



海東續小學乾

立教 明倫 敬身 稽古

13
1825
1



1825
卷 1-2

小 學 圖

立教

立胎育保養之教
立小大始終之教
立三物四術之教
立師弟授受之教

明倫

明父子之親
明君臣之義
明夫婦之別
明長幼之序
明朋友之交
明心術之要
明威儀之則
明衣服之制
明飲食之節

敬身

稽古
明倫

立教

嘉言

廣立教
廣明倫
廣敬身

善行

實明倫
實立教
實敬身

敬身



右退溪先生小學圖也小學圖至先生始有
而先生東人也茲收載卷首

海東續小學篇目

立教第一

內篇

明倫第二

明父子之親

明君臣之義

明夫婦之別

明長幼之序

明朋友之交

通論

敬身第三



明心術之要

明威儀之則

明衣服之制

明飲食之節

稽古第四

立教

明倫

敬身

通論

嘉言第五

外篇

廣立教

廣明倫

廣敬身

善行第六

實立教

實明倫

實敬身

引用書冊目錄 世代先後未及定次

麗史 我 世祖朝命鄭麟趾著

高句麗史

東京誌

國朝寶鑑 我 世祖朝命撰

國朝曲史 誤 李世璣著

東言當法

國朝彙語

小華言行錄

楓巖輯話

平壤誌

八域誌

青野謾集

羣豹一斑錄

瑣篇 李月沙廷龜著

於于野譚 柳參議夢寅著

東史撮要

退陶言行錄 李德弘著

旬五誌 洪萬宗著

大東韻部羣玉

海東韻部羣玉

海東雜錄
南溪禮說 文純公朴世采撰

鵝城雜記 清江李濟臣著

識小錄 許均著

海東野言

閒居謾錄

公私見聞錄

畸翁謾筆 鄭弘漢著

秋江冷談 南孝溫著

圃樵雜錄 任輔臣著

筆苑雜記 徐四佳居正著

私淑齋訓子說 姜希孟著

彝尊錄 伍畢齋金文忠公宗直著

因繼錄 鄭載崙著

青坡劇談 李陸著

海東名臣錄 金堉著

鯁鯨瑣語 清江李濟臣著

莊陵誌

雙節錄

石潭日記 李文成公珥著

輿地勝覽

沙溪語錄 金文元公長生著

擊蒙要說 李文成公珥著

東儒師友錄 朴南溪世采著

松窩雜記 李暨著

續雜記 柳確溪馨遠著

南溪記聞 朴文純公世采著

士小節 李德懋著

記言 省叟許文正公穆著

愚得錄

記善錄

景遠錄

恥齋日錄 洪仁祐著

寒岡言行錄

遣閑錄

撫松小說

野言通載

忠烈錄

內範

慵齋叢話

睡隱錄

三國史

海東樂府

逐睡錄

東溪雜說

諸先生文集

海東續小學序

蓋自箕聖東來誕敷八條之教彝倫叙而九瀆
行亦粵我 聖朝德教休明比隆三代忠孝貞
烈之行人人成性禮義廉恥之風在在成俗可
不謂之小中華哉其有德行善蹟之章章表著
者若在朱夫子之前則見采於小學書中立教
明倫敬身稽古嘉言善行之篇而惜乎出於左
海之一隅偏僻之地也吾黨之士有內舍生朴
在聲者以有志於為己之學潛心經籍尤尊信小
學尊信小學尊信朱夫子而然也於是乎攬撫

海東續小學序
我東方賢人君子節婦義士之事行範世陶俗者彙分類別依朱子小學篇目編輯成書是亦有輔於做人樣子矣甲申四月小滿節性齋八十八歲翁孔巖許傳題


海東續小學序

小子輩方講小學於苧山第余使之前曰此書羽翼聖經修齊治平之道已基於入學之初而門庭序次燦然明備開牖後學功在萬世小子其勉之哉座有嶺南一士曰吾鄉有朴斯文在設香擔吾東前輩言行而規模凡例一遵朱子題之曰海東續小學公其序之余遂亟請一覽覽未半歛衽起敬曰斯文此編可為小學羽翼也猗哉列聖朝以小學一部表章而訓迪之至于今家諭而戶誦之扶倫綱而補風化者適

海東續小學序
追三代然而初學之士直以古今異宜不可企及鮮能行之今此編緝卽我東前輩言行之習熟於見聞其所以感發而興起者尤速於置郵而傳命矣且我東自箕封以後禮樂文物模擬中華本朝五百年來名儒碩輔逸士淑媛指不勝屈而此書所載特舉其一二者從可以知舉一世而成俗也又奚必多爲乎哉嗚呼斯文之自序言簡而意切矣後之學者與朱子題辭并看之則其庶幾乎因以序之又以勉之於小子輩月城人李裕承序

海東續小學題辭

左海瀾壤則小中華文運漸敷儒賢輩出義士烈婦孝子忠臣上下千年磊落相望徽謨懿蹟隱見異途朴庠在馨悉加編輯規樞門目小學是依賴有彝天到底因墜志在範俗厥功偉然莫曰地偏莫曰世遠人無顯晦道無古今苟體而行做人樣子吾黨蒙士盍受是書非朴庠言羣賢之訓真城李晚寅題



海東續小學卷之一

密城朴在聲纂輯

立教第一

立建也教者古昔先賢教人之法也

擊蒙要說曰生子自稍有知識時嘗導之以善若幼而不教至於既長則習非放心教之甚難教之之序當依小學

一蠹先生鄭文獻公汝昌少時嗜酒一日與友人痛飲醉倒曠野經宿而返母夫人責曰爾父既没未亾人所賴者惟爾也今爾如此吾誰



賴字先生浚自刻厲酒醴更不接口觀錄

東臯李忠定公浚慶母夫人申氏常戒曰寡

婦之子人不與交必十倍勤學以母墜舊服觀

孀

私淑齋訓子說曰夫父之於子猶農夫之於

嘉穀養穀不成終罹饑餓之患教子無成竟致

孤危之禍其糞壤耘耨之法訓誨翼勵之方曷

嘗以弛於心

羨養子弟日見父兄享富貴意以為人皆如此

彼安知今日綺紈之輕暖乃前日履屨之儉今

日膏粱之軟美乃前世麤疎之積歟不知其源

何能有為

退溪先生曰古者鄉大夫之職導之以德行

道藝而糾之以不率之刑為士者亦必修於家

著於鄉而後得以賓興於國孝悌忠信人道之

大本而家與鄉黨實其所行之地也先王之教

以是為重故其立法如是至於後世法制雖廢

而彝倫之則固自若也惡可不酌古今之宜而

為之勸懲也哉退

退溪先生諭四學諸生曰 國家設學而養

士其意甚隆師生之間尤當以禮義相先師嚴
生敬各盡其道自今諸生凡日用飲食無不周
旋於禮義之中惟務相勸勵灑濯舊習推八事
父兄之心為出事長上之禮內主忠信外行遜
悌以副 國家右文興學設校養士之意

○重峯趙文烈公愚上疏曰竊見山海關以西
村立鄉約所皆高皇帝所定之教也父子兄弟
雖多異爨而不忍分門割戶如遇正至生日雖
一門少屋之人必以四拜禮賀于尊長族人
有喪則男女長幼俱以白衣巾終其月數四歲童

子亦能作揖厮夫走卒亦一無斂髮之不正者
我國本以禮義之邦民心日漓紀綱板蕩聞之
故老已卯歲寧邊民有貧不能養其父而棄之
壑者聞鄉約之書降自朝廷即日迎歸而竭力
以養焉若此不已則其何以不為善俗乎

○周慎齋先生世鵬與人書曰切切勉進勿暫
刻弛過若謂有來日便不得進步來日又來日
吾之白髮積來日得之痛悔無及

○退溪先生與子窩書曰三冬長夜勤苦讀書
今不勤苦做業隙駟光陰一去難追千萬刻念

毋忽毋忽

○人有質問雖淺近說話必留以間而答之未嘗應聲而對見退陶言行錄

○裴教官紳號洛川戒門生曰勤苦有無限好味乘肥衣輕非學者事汝於勤苦氣味最欠雖有美質不能長進吾嘗為汝憂之親南冥師友錄

又曰蕩心伐性無如酒色然酒之欲輕猶可易制男女之情大欲所在其害尤重避色如避寇方可以有為汝曹宜戒之

○成大谷運曰志先立而行隨之須將鼓舞振

作四箇字常自激昂委靡偷惰者雖有美質沒無有成之理全

○權晚悔得已曰問學之道無他只心要無一毫虛偽事要求一箇是而已親親錄

○河西先生金文正公麟厚嘗謂學者為學亦必時時體忍浴沂庭翠底意思方能少進耳

○南冥先生曹文貞公植曰沉潛底人須剛克做事天地之氣剛故不論甚事皆透過

○晦齋先生嘗謂道備於吾性而其說具在方冊若能篤志無不得之理見退陶集

○退溪先生曰學者以其孳孳鄉道之誠易其汲汲馳外之心本之於性分而求之於方冊則凡古聖賢一言一行皆可自法

○趙文孝公翼曰朱子釋經可謂盡矣猶有曰不盡釋云者欲因其所釋而求之以及於其所未釋此誠先賢之所望於後學者也見浦

○漢陰李文翼公德馨訓子弟帖曰

濂溪周先生自少信古好以名節自砥礪奉己甚約俸祿悉以周宗族及分司而歸妻子饑寒或不給而亦曠然不以爲意襟懷飄灑雅有高

趣九樂佳山水遇適意處或徜徉終日黃山谷曰茂叔人品甚高曾中灑落如光風霽月

明道程先生姿稟既異充養有道寬而有制和而不流視其色接物也如陽春之溫聽其言入人也如時雨之潤其行已內主於敬而行之以恕教人而人易從怒人而人不怨賢愚善惡咸得其心終日怡悅未嘗見忿厲之容

伊川程先生學本於至誠其見於言動事爲之間者疏通簡易不爲矯異不爲狷介寬猛合宜莊重有體先大夫太中年老左右致養無違以

家事自任悉力營判雖細事必親贍給內外親族八十餘人其教人以居敬窮理為主橫渠張先生言有教動有法晝有為宵有得瞬有養息有存嘗曰書多閱而好忘者只為義理未精耳義理有疑即濯去舊見以來新意讀書須成誦精思多在夜中靜坐得之不記則思不起矣教人以禮為先

康節邵先生始學於百源堅苦刻厲冬不爐夏不扇夜不就席者數年其學純一而不雜平夷渾大不見圭角程明道曰堯夫四通八達如空

中樓閣

武夷胡先生凡辭受取舍一介之微必度於義恬靜簡默寡於言動每晨昏子弟定省必問其所業曰士當志於聖人見怠慢不敬必頓蹙曰流光可惜無為小人之歸教人以立志為先忠信為本以致知為窮理之漸以居敬為持養之要

晦菴朱先生閒居未明而起浹衣幅巾方履拜於家廟退坐書室几案必正書籍器用必整奉親極其孝撫下極其慈閨庭之內恩義之篤怡

怡如也祭祀無鉅細必誠必敬小不如意終日
不樂祭無違禮則油然而喜於親故雖疎遠必
致其愛於鄉黨雖微賤必致其恭自奉則衣取
蔽體食取充腹居止取足以障風兩人不堪而
處之裕如也

南軒張先生為人坦蕩明白表裏洞然詣理既
精而信道又篤其樂於聞過而勇於徙義則又
奮厲明沒無毫髮滯吝意以至疾病垂死而口
不絕吟於天理人欲之間則平日所養可知也
答鄭自明書曰天理難窮資質難恃工於論人

者察已常疎狃於訐直者所發多弊病

偶閱宋時諸老先生言行錄拈出其中切要者
書送願兒輩常日在之以感發良心噫父母之
情爾其知之漢陰集

○林瞻慕堂芸字彥成葛川薰之弟也常曰世
人不勤謀生馴致家業之零替非徒仰事俯育
之不克送終報本之禮亦廢而不舉者多矣可
謂能盡其人道乎彼以不義者固不足道如其
義也有何嫌乎

海東續小學卷之一

海東續小學卷之二

密城朴在馨纂輯

明倫第二

明明之也倫人倫也

退溪先生曰孝為百行之源一行有虧則孝不得為純孝矣

○擊蒙要說曰人子之受生性命血肉皆親所遺喘息呼吸氣脉相通此身非我私物乃父母之遺氣也豈敢自有其身以不盡孝於父母乎人家父子多是愛踰於敬必須極其尊敬父母

所坐臥處子不敢坐臥所接客處子不敢接私
客上下馬處子不敢上下馬可也

凡事父母者一事一行毋敢自尊必稟命而後
行若事之可為者父母不許則必委曲陳達領
可而後行若終不許則亦不可直遂其情也

○晦齋先生曰人子之事親必以恭敬為本以
修身慎行為先如有一毫驕吝之心爭亂之事
必至於辱身危親其不孝大矣口腹之養奚足
贖哉

○退溪先生曰古人悅親不必官爵尹和靖母

所謂吾知汝以善養不願汝以祿養

○甘旨之闕雖人子之心所甚憂者亦不可以
是而別生意息別求方法以要必得之也今人

每以榮養藉口而受無禮義之祿食若充類而

言之與乞墻間而充甘旨自以為孝殆無以異

故君子雖急於奉養不以是變所守也親退

○記言曰敬親者一舉足而不敢忘父母母服

闔而招咎母履險而危身愛親者一出言而不

敢忘父母母苟訛而招詬母苟笑而媚人

○旅軒先生張文康公顯光曰吾一身乃百千

萬代之祖先所流傳以遺之者則其敢曰吾身
即吾所有哉輕吾身即輕吾祖先也或至辱其
身敗其身者無非辱其祖先敗其祖先也然則
盡愛之理致孝之道果外於能愛其身而敬重
之者乎一思慮而思祖先恐有違於祖先之心
也一云為而思祖先恐有違於祖先之德也一
動作而思祖先恐有違於祖先之道也戰戰焉
兢兢焉常若臨深淵履薄冰焉則庶乎可以能
不墜祖先之遺訓祖先亦可謂有子孫也
○栗谷先生李文成公珥曰今人多是被養於

父母不能以己力養其父母若此查過日月則
終無忠養之時必須躬幹家事自備甘旨然後
子職乃修若父母堅不聽從則雖不能幹家亦
當周旋補助而盡力得甘旨之具以適親口可
也

○尤菴先生宋文正公時烈曰父母以性命之
全遺我而性命之中萬善畢具一善未明非孝
也一善未行非孝也必須盡去人欲而盡復天
理使父母遺體常立清明正大之域雖父母沒
此心不衰然後父子之倫亦可謂盡矣

芝山先生曹文簡公好益祭祀尤致謹凡百器用別所藏之家衆執事皆前期沐浴以布掩口鼻然後滌器具饌并泉豫爲陶淨不使他人混汲醋醬亦爲別置不令他用

○金健齋子益每享祀極其誠敬庖廚不離左右祭物必親檢別以小冊書祭儀令內外居常謙習將事之時公正色凝神不出一言執事者不失尺度諱日素衣冠食饘粥如初喪見集

○聽松先生成文貞公守瑛立墓祭法置墓田臧獲構室墓下藏器有閣收穀有庫具膳有廳

致齋有房凡百皆備以至床席器用之細皆規畫精固爲之立籍以爲經遠之圖觀集

○黃朽淺宗海門規曰諸子孫敬事宗子毋或慢之如有慢之者則是無異於慢其祖先也親法當

○退陶言行錄曰奉先主於誠敬而不貴於物後守業在於繼述而每患於終怠

右明父子之親

慕齋金文敬公安國曰平時則勿欺盡職臨危則效死勿貳

○洪判書曇嘗曰上臣事君以人中臣事君以
身下臣事君以貨余雖不得為上臣願無失為
中臣觀之峯

○靜菴先生趙文正公光祖進講而退謂學者
曰人雖有美質必待學問然後知事君之道大
凡進講之際雖小官討論經義極陳皇王之道
輔養君德則無所過矣

○思齋金文定公正國曰余自校理歷典翰直
提學必取所講書從頭至尾歷覽考閱無有闕
疑每入直又與僚員終夕徹夜質疑問難校足

於心而後進講講臣職分當然也筵臣不閱講
書臨時取其蒼黃失對誠非細故可以為講臣
之誡伊川每當進講必夙齋預戒潛心存誠冀
以感動上心臣子用心當如是也觀海東

○李漢陰子如璧除關西縣宰公寄書誡之曰
我既負國竊廩尚叨匪據而汝又以我蔭為民
宰非有施為政令之勤於人者人皆指為何哉
辱親負國唯在汝處之以誠勤與否耳出門如
見大賓使民如承大祭乃聖人勉以為仁之功
汝臨事每思此言則心不放而思過半矣聽政

之暇勤讀經書本源自有培養之地汝其念之

見漢陰集

○張旅軒先生曰鄉曲中凡民豈待立朝事君然後有以致君臣之義哉惟能各職其職各事其事以不負國家生養囿育之恩乃民之義也讀書業士者其志固有望於他日矣至於服田食力之人凡其一衣一食一坐臥之安無非國家之澤也其所以報效之道只在慎貢賦力徭役而已

右明君臣之義

我東昏禮鹵莽中古以來士夫皆於昏夕委禽婦家而不行合甃之禮三日後方行之此甚無謂徐花潭始折衷為昏夕合甃之禮至今行之

見晦隱集

○退溪先生曰夫婦人倫之始萬福之源雖至親至密而亦至正至謹之地世人都忘禮敬遽相狎昵遂至侮慢凌蔑無所不至者皆生於不相賓敬之故

怒為外人發者易於制止為家人發者難於制止難於制止者於家人責望素重而又在吾手

下故怒易至甚而或不屑於制止耳凡此皆理
不馭氣而不免於任情害仁之病矣行錄

○南溪禮說曰我國薦紳雖稱巨闕自高麗以
上靡得以詳則夫諸李之鄉貫雖異籍安知其
不如魯之庶姓自別而俱出於一源乎嘗聞之
故老李漢陰德馨於壬辰倭亂時以接伴使隨
天將往來幕中儒士有慕其風儀者又聞娶於
李山海之門曰此夷虜之風也中國絕無此事
又曰李爺若非此事豈不為完人至於國家議
婚率斥姓李者不在揀選中 宣廟朝自有所

屬望必欲破此格而諸名臣引爭之甚力遂從
之獨士大夫家至今承訛襲舛不以為非蓋任
使從俗不稽古經之過也

○吳秋灘允謙字汝益海州人 仁祖臨筵問

孔子曰戒之在色戒之在鬪戒之在得三者孰
最難公對曰色最難 上曰予則以為戒得最
難公曰戒色者非必盡心於妖物夫婦之間或
不能相接以禮是亦不善於戒色 上曰卿言

果是矣

見東言當法

○曹南冥先生曰恒居不空與妻子混處雖有

資質之美因循汨沒終不做人矣

○白沙李文忠公恒福曰聖人制禮年過七歲男女不同席嫂叔不通問其別嫌慎微之意至密且詳不如是無以防後世之嫌而有以起淫泆之端後世之人不知此意親戚接遇有別則曰短於睦族指無倫無法之家曰親戚相愛至於接膝而坐同床而食謔浪笑傲駸駸淪入於禽獸之域而自不能覺或謫興於情外變生於帷簿以身滅族而後悔可不戒哉見白

○牛溪先生成文簡公渾曰姊妹夫不在不可

夜入其室而與姊妹語也見師友錄

○退溪先生曰閨門之間日用周旋飲食言笑豈可與裸股肱不裹頭奴人相對無障蔽耶見退溪集

右明夫婦之別

退溪先生曰古人事兄如事嚴父出入扶將以盡子弟之道見言行錄

○或問兄弟有過可相言之否退溪先生曰此是最難處事但當致吾誠意使之感悟然後始得無害於義若誠意不孚而徒以言語正責之

則不至於相踈者幾希故孔子曰兄弟怡怡良
以此也全上

○張旅軒先生族契議曰篤其恩以一其心定
其規以齊其事時焉講睦以融其和好之情事
焉同力以通其資助之義使之富有所分貧有
所濟慶同其喜憂同其恤此所以保家宜族之
深慮遠計也軒集

同吾所受之氣同傳祖先之姓者勢雖至於踈
遠事或涉於咎怨豈以踈遠而忘之咎怨而讎
之哉嗚呼若自祖先之為父母者而兩視之則

曾不過一呵一撻而止者為子孫者不體祖先
同慈之恩不念百枝一本之義怒焉藏之怨焉
宿之此果待同氣之道乎此吾族人所當深戒
者也

異姓踈遠亦推先世之恩廣媿睦之道以先世
視之慈情豈間於內外人莫不有子女以其情
而體吾先世之心則可以想矣當不分同異姓
其相厚之義則宜無間然

○士小節曰後長者寢先長者興點燈伏火手
自習之日執巾帚以拭以掃整掛床席齊摺衾

禱檢圖書帙筆硯

同學之兒年雖相若或有先冠者稍敬之勿爾
汝也勿服長者冠帶以為遊戲勿坐臥長者之
坐臥處

長者之會有可聞之言必參坐敬恭聽銘心不
忘或有可記之事必退而記之

○趙龍洲綱往一宰臣家蔭官老人先在座主
人孫兒年方六七甚嬌愛使兒戲辱蔭官公正
色曰小兒心氣未定雖撻而教之使敬長老猶
有不奉其教今乃教之以侮辱兒必認以為老

既可慢則兄可慢父可慢君上亦可慢幾何不
至於犯惡逆也主人氣塞不能言

○厭避長者甘處下流最是日入於庸賤陋惡
幼與儻人遊者雖至壯大言語容貌終未超脫
俚俗之氣故教子弟必使之從遊醇謹雅飭之
人方不竟抵于不肖無狀詩云出自幽谷遷于

喬木見士
小節

右明長幼之序

擊蒙要訣曰凡侍先生長者當質問義理以明
其學侍鄉黨長老小心恭謹不放置語有問則

敬對以實與朋友處當以道義講磨只談文字
義理而已世俗鄙俚之說及時政得失守令賢
否他人過惡一切不可掛口與鄉人處隨問應
答而終不可發鄙褻之言雖莊栗自持而切不
可存務高之色惟當以善言誘掖必以欲引而
向學與幼者處當諄諄言孝悌忠信使發其善
心

○愚伏先生鄭文莊公經世曰朋友功德之道
惟當隨遇而盡其心不當以吾知未至吾行未
力而愨然於忠告之事至於君子聽言之道則

但觀其理之得失而為從違不當視其人之賢
否而為進退

○靜菴先生曰學者立志雖以聖賢自期未為
過也至於待人則每取其長而務廣容人之量
可也躬自厚而薄責於人不可不體認

○李永膺至男戒其子曰士以忠信不欺為本
今之學者專事邀遊隨朋逐伴論人是非至於
失身者多切宜痛戒見蓮峯集

右明朋友之交

金慕齋請於朝曰萬民至眾不可家喻而戶曉

必有鼓舞振作之方然後民自興起而從善也
祖宗朝撰三綱行實形諸圖畫播之歌詠頌
諸中外使民勸習甚盛意也然長幼朋友與三
綱并為五倫以長幼推之敦睦宗族以朋友推
之鄉黨僚吏亦人道所重不可闕也當以此二
者補為五倫行實擇古人善行為圖畫詩章頒
諸中外敦勸而獎勵之

○趙龍門昱教子有法少有差失則必舉小學
章使讀而責之諄諄曰人之為人不出此孝悌
而為聖為賢亦在推而大之也立身揚名以顯

父母雖是人子之道若以富貴利達為心則事
親事君必不得善其終矣汝輩切宜戒之子弟
未敢以榮利為言

○晦齋先生曰天之生物理無虧欠而人之處
物每不盡理如君臣父子兄弟夫婦皆出於天
性而各有當然之則有一毫不盡其心不當乎
理是為不盡分也聖人所以為人倫之至者只
是盡其分也

○退溪先生曰君父一體事之如一惟其所任
則致死焉然父子天屬就養無方君臣義合就

養有方無方者恩常掩義有方者義或奪恩有
不得不去之處

郭念憂堂再祐與女壻書曰世人見新郎形
容之善歌舞之美例以奴婢田地別給余則亂
離之後奴婢盡死於飢餓無可別給也田地則
好田好畝處處陳荒欲耕則無禁不須別給也
余以一言平生之所為寶者別給何也勤以讀
書慎以持身忠以事君孝以事親其於行世也
萬倍於有奴婢千萬口者也余之所贈不亦大
乎請服膺而勿失之人無與爭之者

右通論

海東續小學卷之二

海東續小學卷之三

密城朴在聲纂輯

敬身第三

敬身者敬以持身也

晦齋先生在謫所几案上書自戒之辭曰吾日三省吾身事天未有盡歟為君親未有誠歟持心未有正歟

○鄭困齋曰讀書講學一以明理為務而不以誇多為意處心行事一以循理為主而不以悅人為意尊賢取友必以誠信而毋以私恭苟容

為心待人接物必以寬恕而毋以犯校責備為
心懲忿窒慾不但制之於已發之後當講明平
日論學之際以知其忿慾之所自遷善改過不
但治之於見聞之後當內省於平日操存之際
以察其善惡之所在見愚錄

○李栗谷先生曰學者終身讀書不能有成只
是志不立志之不立其病有三一曰不信以聖
人之言為誘人而設只玩其文不以身踐二曰
不智自分資質之不美安於退托殊不知進則
為聖為賢退則為愚為不肖皆所自為也三曰

不勇稍知聖賢之不我欺氣質之可變化只是
恬常滯故不能奮發昨日所為今日難革今日
所為明日憚改如是因循進寸退尺人有此三
病故君子不世出六籍為空言可勝歎哉

○曹南冥先生曰學莫要於持敬故用工於主
一學莫善於寡欲故致力於克己

○申松溪季誠曰存養熟則氣象高大省察久
則此心自然誠明見師友錄

○靜菴先生曰古人云希顏要枉用心剛剛則
為善不難矣如某者亦於清夜澹寂之中或有

志氣清明之時苟能養之不失則古人可希而
用心不剛故明日還有終擾之患矣

○成大谷曰克己一端為學第一功夫所謂已
者吾心所好不合天理之謂也須於日用仔細
檢察纔覺已私一劔兩斷淨洗心地不留苗脉
則自然天理昭著人欲退聽

○張旅軒先生曰見善必遷則可以盡天下之
善有過必改則可以無一身之過遷善而至於
盡善改過而至於無過

○金冲菴淨勇箴曰世有大勇者毀之而不怒

犯之而不驚辱之而不屑夫勇於行義故忿懷
之事不八于懷徒見其恂恂如也

○記言曰自私者欺人天理昭著人不可欺徒
自欺耳故誠身必自丑自欺始

○金冲菴曰見憂而憂憂未必去見懼而懼懼
未必止惟其徐而察之使自解之和而受之使
自消之乃達理之行造道之至是以君子樂天
知命故不憂不懼

右明心術之要

靜菴先生曰持己當使嚴中有恭恭中有嚴此

所謂禮樂不可斯須去身者也

○金冲菴曰容儀者一身之表而德之符也望之而可敬卽之而可慕蔚然凝遠者其中之所養可見也自非聖人不能從容中道則貴夫修飭惕厲莊以律身夫莊則重重則和和則明夫如是心正而身修矣世俗之人憚於拘束頑慢自恣遊戲於禮法之外積習爲常恬不爲恠以是而求入於德不亦遠哉夫君子周旋中規折旋中矩揖讓升降酬酢進退以至日用動靜無不有節固將遠其粗僻之習而養其中和之德

未嘗敢自暇荒廢也

○徐花潭敬德曰若不危坐息慮不一息慮不一則不能窮格

○退溪先生曰收斂身心齊莊整肅則有時盤坐雖不如危坐之嚴肅自不害義理

○洪恥齋仁初曰儒者苟志學聖賢動容周旋當以古人爲準若畏人非笑恟於爲善終必爲無狀人

○慕齋家訓曰慎言語勿誇己長而談人短勿談過惡及隱微之事勿談國家朝廷政令得失

勿言守令宰相朝官得失勿喜談淫褻醜語聞人善則喜而談之勿言毀人之語勿談傲慢侮人之言勿談反常凶悖之言勿壽張妄說言語

○寒暄堂先生金文敬公宏弼訓諸子曰爾等心存敬畏無敢懈怠人或議已切勿相較言人之惡如含血噴人先汚其口宜以此為戒

○寒岡先生鄭文穆公速嘗言學者自持其身當如閨中處子不可一點受汚於人至於有官者尤不可輕見輕見則必有後悔觀陳無已所以辭章子厚則其所以自重者如何哉此不可

不為之法也

○士小節曰君子出入進退有信有漸不可來如驟雨去如飄風

男子長處內而頻入閨則儀多失而威不行

不可因一小愁作嘔噎欲哭之狀不可因一小恚作吼咆欲罵之容

○磻溪柳處士馨遠曰志於道而未能立者志

為氣惰也夙興夜寐未能也正衣冠尊瞻視未能也事親之際和顏色未能也居室之間敬相對未能也

右明威儀之則

靜菴先生曰古云齊明盛服只令精潔寬大而
已可也豈奢侈之謂哉朝廷士大夫若以儉素
相尚則儒生亦必效之不尚奢侈當自士大夫
始常時賢士會處豪富子弟如或相遇必發愧
顏空使人人皆如是知愧焉

○尚成安公震每謂子弟曰丈夫之志不累外
飾服美于人可恥之甚者也見清江集

○蘇齋先生盧文懿公守慎曰衣者身之章所
以正威儀惜損費非欲誇耀於人計較於利也

○安公坦大家世寒微性敦謹不與人較女入
宮為中宗後宮是為昌嬪自是持身愈謹及
嬪生王子遂杜門不出恐人或以王子外家稱
之昌嬪次子德興大院君寔誕我宣祖大王
入承大統安公處地尤尊貴而不變賤時之心
身不着綉緞晚以老病失明宣廟欲榮其身
擬以尚方所進貂裘賜之而恐違雅志使人試
之曰主上方製貂裘以賜公既賜之後則公不
敢不着矣安公曰我是賤人着貂裘死罪違
上命亦死罪毋寧安分而死上知其意不可

奪命家人稱以兒狗皮以進之安公以手摩之
曰尚方之狗有別種耶毛之柔細何至於此耶
乃加於身 宣廟之於安公乃外曾孫也而不
過厚其衣食安其寢處而已未嘗加一命之官
蓋不敢官私人也至 孝廟朝追賜右議政公

私聞見錄

○鄭相公維城之孫齊賢尚淑徽公主為庚平
尉公益加畏慎嘗謂公主曰主不欲孫兒生耶
對曰不省所謂公曰福過則災生吾家世世清
寒今奉承太過則禍孽必生願加節省後庚平

將死公就見之見室內內賜服物出而歎曰空
其死矣

○淑徽公主嘗請得一繡衣裳 孝廟下教曰
吾方君臨一國欲以儉示先豈敢令汝着繡衣
乎吾萬歲後汝慈母氏為大妃則汝雖着此人
不浚咎姑待他日可也終不許見公私錄

右明衣服之制

盧蘇齋曰節飲食不多食食不厭精飲不厭溫
食不語先飢而食食不可太飽先渴而飲飲不
可太多食欲數而小不欲煩而多食不可急當

輕吞緩嚼高梁五味不可過食勿使肉勝食氣
食忌生冷堅硬焦燥粘滑之物勿食申後飯勿
飲卯時酒酒不可過茶不必啜

○南秋江孝溫曰夫酒之為德得其中則可以
合賓主可以養耆老行之几席而有文達之天
地而不悖失其中則囚首散髮恒歌亂舞叫呼
宰百拜之間顛仆於相讓之際敗禮滅義發作
無節甚者無故而憑心怒目爭鬪或起小而殞
身中而公家大而公國者比比有之得失之間
不容一髮可不慎哉中下之人所執不堅而用

之不節則甘味移人愈危愈亂至於酗而不知
其所以醜者理之必然為士當躬飭內詔杜絕
亂根百倍平人然後可免此禍矣

○孝廟幸禁苑別堂尚食進午飯東平尉侍食
才過五六匙以水澆飯飯多不能盡喫上責
之曰量而後澆之使無所餘可也澆水餘飯或
食禽獸則猶為有用之物無知下賤全昧貴穀
之道多棄汚地未免為暴殄天物之歸使之然
者皆由於喫飯者甚非惜福之意也東平悚然
敬服偶於撤膳之時竊視御盃無一物畱底者

見國朝
彙言

○退溪先生入京寓西城內左相權公轍往見焉先生具飯待之淡饌薄味不可食而先生若啖珍味以無難意權公竟不能下筯退謂人曰從前誤養口體到此甚可愧也見言行錄

○孟文貞公忠誠清潔簡古不事生產飲食常以祿米一日家以新米飯進之公曰何處得新米家人言祿米甚陳不可食借於隣家耳公惡曰既受祿當食其祿何事於借

○尚成安公平生自奉甚薄朝夕所供不過數

器味若豐進則必捨一器曰古之賢相食不重

肉况我乎有時厨肉不繼家人欲買諸市止之

曰我家若買之亦近於矯偽見清江集

○退溪先生僑居漢城隣家栗樹數枝過墻子

熟落庭恐兒童取食拾而投之墻外見士節

○士小節曰儉者自奉節故常有餘而能施奢者自奉厚故常不足而反吝

右明飲食之節

海東續小學卷之三

海東續小學卷之四

密城朴在馨纂輯

稽古第四

稽考也此篇考羅麗賢人已行之跡以證前篇立教明倫敬身之言也

金庾信為兒時母日加嚴訓不安交遊一日偶宿女隸天官家其母面數之曰我老日夜望汝成長立功名今與小兒遊戲滄房酒肆耶號泣不已庾信即於母前誓不復過門一日被酒馬遵舊路誤至娼家公悟斬所乘馬棄鞍而返東

京誌

○金盤屈新羅沙梁人父欽春受命伐百濟至
黃山原戰不利欽春召盤屈謂之曰為臣莫若
忠為子莫若孝見危致命忠孝兩全盤屈曰謹
聞命矣乃力戰死之三軍感義皆有死志進擊
百濟破之上

○安文簡公宗源年十七登第選補史翰當遷
同僚沈東老年高位下公讓之公之父軻諡文貞
聞喜之曰讓德之先也我讓於人人誰捨我我
家有人殆蓋昌乎見麗史

○李文貞公岳嘗寫太甲篇獻于王謂其子罔
曰吾既老矣無官守無言責當以格君心為務

上○咸有一位至尚書不事生產其妻曰及公生
時何不慮子孫計答曰余勤儉守節以立門戶
兒輩但當正直節儉以俟命耳何戚戚於貧窶
乎

○崔侍中瑩年十六父雍戒之曰汝當見金如
石公終身佩服服食儉約屢至空乏見乘肥衣
輕者不啻如犬豕雖身都將相久典兵權關節

不行賞賜民田皆固辭不受

○祭酒先生禹文僖公博通經傳尤邃於易時程傳初來東方無識者遂閉門月餘參究乃解教授生徒義理之學始行矣見麗

○晦軒先生安文成公裕憂學校日衰議兩府請令百官出錢布以贍學錢兩府從之以聞王出內庫錢穀助之有武人不肯出錢公謂諸相曰夫子之道垂憲萬世臣忠於君子孝於父弟恭於兄是誰教也其人慚甚即出錢又以餘財送中原畫先聖及七十弟子像並求祭器樂器

六經諸子史以來

見羣芳一斑錄

右立教

孫順年梁人父歿家貧備作以養母順有少兒每奪母食順與其妻負兒歸山掘地欲埋忽得石鐘謂其妻曰得此異物殆兒之福不可埋也將兒與還懸於樑撞之聲聞王宮興德王聞之曰西郊有鐘聲清遠異常即令尋得之曰昔郭巨埋子天錫金釜今孫順埋子地出石鐘前後同符賜順家一區歲給粟五十石見東
○不寧子新羅中軍也真德王時百濟來侵金

庾信率兵拒之苦戰力竭庾信謂不寧子曰歲寒然後知松栢之後凋今日事急矣非子誰能奮力出奇以激衆心乎對曰今於稠人廣衆獨屬我可謂知己當以死報之出語其奴合節曰今日當上爲國家下爲知己死遂橫槊力戰而死子舉真曰見父之死偷生苟存豈得爲孝亦死之合節曰所天崩矣不死何爲亦交鋒而死三軍感激奮擊手濟兵破之見三國史

○神武王生子容貌美好王奇愛之名曰好童元妃恐奪嫡譖于王乃泣告曰好童欲無禮於

妾或曰何不自釋好童曰我若釋之是顯母之惡貽父之憂遂伏劍而死

○靈山辛氏郎將斯蕝女也倭寇靈山斯蕝挈家避亂將渡葭浦賊追及射斯蕝殪之執辛氏欲與俱去露刃劫之辛氏大罵曰汝旣殺吾父不共戴天之讎也寧死義不從汝生遂扼賊吭蹴之賊怒遂害之時年二十事聞于朝立石紀其績見輿地勝覽

○朴慥妻林氏事姑田氏盡婦道慥宦遊京師林氏獨侍夜分家失火人皆驚愕自救姑老且

病伏枕不能起林氏亟入抱其姑出觸階而仆
風烈火熾以身蔽姑頭背爛終不捨有健僕感
其義走入悍火負以出姑婦俱免世號林義婦

全上

○金后稷新羅真平王時人王好佃獵后稷切
諫不聽將死語其子曰我爲人臣不能匡救其
惡我死須瘞於王之遊佃路側其子從之他日
王出佃中道有聲若曰王無去者三王顧問之
從者曰金后稷墓也遂陳臨死之言王潛然流
涕曰夫子生而忠諫死而不忘其愛我深矣若

終不改何顏見夫子於地下耶終身不復佃獵
人謂之墓諫

○朴堤上新羅人訥祇王有二弟卜好質高句
麗未斯欣質倭國王息其弟聞堤上勇而謀召
問曰吾二弟久質麗倭何術以生還堤上曰臣
雖無狀請行遂聘高句麗言辭激切麗王許與
同歸既還王語堤上曰我念二弟如左右手今
得一臂奈何堤上曰既以身許國何敢辭遂以
死自誓不見妻子若爲得罪而叛者入倭國倭
王信之將襲新羅以堤上未斯欣爲鄉導行至

海島勸未斯欣潛逃堤上獨寢舟中晏起以俟
欣之遠行倭王覺怒囚堤上鞠問堤上曰臣是
雞林之臣欲成吾君之志耳倭王怒具五刑曰
汝稱倭王之臣則必賞以重祿堤上曰寧爲雞
林之犬狔不爲倭王之臣子寧受雞林之捶楚
不受倭王之爵祿倭王剝堤上脚刈兼設使趨
其上曰汝何國臣曰雞林之臣又使立於熱鐵
乃燒殺木島中王聞之哀痛贈太阿鎗厚賜其
家使未斯欣娶其女堤上妻率三女上鷄述嶺

望倭國痛哭而死至今嶺上有望夫石

○勿稽子新羅人倜儻有大志奈解王時浦上
八國侵加羅王命與子老利音往救之勿稽子
有大功見忌於利音不記或曰子之功莫大而
不見錄怨乎曰何怨之有又曰蓋聞于王曰於
功求名志士不爲但勵志而已後渴火城之戰
有功又不見錄乃語婦曰爲臣之道見危致命
臨亂忘身忠也渴火之役不能以致命忘其身
聞於王不忠也旣以不忠累及於先人可謂孝
乎旣失忠孝將何面目以出市朝遂被髮攜琴

八師巍山不返

○金欽運新羅武烈王時人以遊花郎文孛之門為郎

幢大監伐百濟屯陽山下濟人乘夜來襲大舍

詮知說曰賊起暗中咫尺不辨公雖死人無知

者欽運曰丈夫既以身許國人之知與不知一

也豈可求名乎遂強立不動從者控馬勸避欽

運以劔揮之遂突陣死之觀三

○竹竹大野陝川人百濟攻大野城主金品釋

將出降竹竹止之曰與其鼠伏而偷生不若虎

鬪而死品釋不聽竹竹收散率閉城固守或勸

出降以圖後功竹竹曰吾父名我以竹竹者使

我歲寒不凋可折而不可屈遂力戰而死賜阿

冷見羣羊約

○申崇謙谷城人佐麗太祖有大勳勞甄萱圍

新羅景哀王於鮑石亭太祖將兵救之萱兵圍

之甚急公時為大將貌似太祖知其勢窮使太

祖隱於礮藪代乘御車力戰死之太祖嘗宴羣

臣使公像隨坐行列賜酒輒乾謚壯節

○敬順王謀降高麗王子曰國之存亡必有天

命當與忠臣義士收合人心以死自守力盡後

已豈宜以一千社稷輕以與人王不聽王子
哭泣辭王徑入皆骨倚巖為屋麻衣草食以終
其身史臣曰王子義烈可與北地王謀爭先日
月而名不傳不獨安市城主之失其名東方文
獻埋沒可惜

見東
京誌

○高句麗王太子解明有力好勇黃龍國王聞
之贈以強弓解明彎而折之曰非我有力弓自
不勁黃龍國王慚欲害之王以為怨結鄰國乃
賜劍或止之曰安知其非詐太子曰我恐敵國
輕我國家故挽折之父命可逃乎遂走馬觸槍

而死

見句
史

○徐熙利川人宰輔弼之子也光宗嘗賜宰臣
金酒器弼獨不受王曰卿能不以寶為寶予當
以卿言為寶熙嘗從成宗幸海州王幸熙幕欲
入熙曰臣之幕非至尊所當臨命進酒熙曰臣
之酒不敢獻成宗乃坐幕外進御酒共飲而罷
初熙祖神逸郊居有鹿帶矢奔投神逸拔其箭
而匿之獵者至不獲而返夢有神人謝曰鹿吾
子也賴君不死當令君之子孫世世為卿相

見
錄

○姜太師部贊衿川人性清儉少好學多奇略
顯宗時却契丹兵除平章事王手書告身曰庚
戌年中有虜塵于戈渡入漢江濱當時不用姜
公策舉國皆為左衽人世多榮之生時大星隕
于其家後宋使見公不覺下拜曰文曲星不見
久矣今在此耶體貌矮陋衣冠垢弊正色入朝
屹然為邦家柱石

○成忠百濟義慈王時人王荒滯耽樂飲酒不
止成忠極諫王怒囚之成忠不食臨死上書曰
忠臣死不忘君願一言而死臣觀時察變必有

兵革之事據險隘以備禦可也王不省遂死獄
中及唐羅兵乘勝薄城王歎曰悔不用成忠之
言以至於此

○崔碩

高麗順孝
主時人

知昇平府以廉謙稱府故事

邑倅替還必贈八馬惟所擇碩秩滿還邑人進
馬請擇良碩笑曰馬能至京足矣何擇為至家
歸其馬邑人不受碩曰吾守汝邑吾有牝馬生
駒今帶以來是我之貧也并其駒還之自是贈
馬之弊遂絕邑人頌德立石號八馬碑見輿
○李文烈公兆年以敢言見憚於王每入見王

聞履聲曰兆年來屏左右整容以俟王一日縱
遊步自北門彈雀于松岡公徑進跪諫曰臣恐
禍在朝夕此而不恤顧玩細好乎王不納公明
日謝病匹馬還鄉不交世間事終身不出規麗
○禹祭酒丹陽人忠宣王自元季喪烝其父幸
妃公為監察糾正翌日白衣持斧束裳上書敢
諫近臣展疏不敢讀公厲聲曰卿為近臣未能
格非而逢惡至此卿知其罪耶左右震慄王有
慚色一見羣綱

○金之岱清道人力學能文倜儻有大志高宗

江東之役父預軍隊之岱以太學生代父而行
戰士楯頭皆畫奇獸之岱獨書一絕云國患臣
之患親憂子所憂代親如報國忠孝可雙修元
帥趙冲點兵見之驚問其故器使之明年凱還

登壯元科

○辛毗譖柳珣於王將殺之家人謂曰不如走
珣曰君父天也天可逃乎王將何之遂就死見

○趙侷初名胤麗胤胤痛哭八頭流山我 太
祖擢拜戶曹典書書以招之胤答曰願採松山

海唐人讀小學卷四

之薇不願為聖人之氓仍改名曰狷字曰從犬
蓋國亾不死有類於犬且取犬有戀主人之義
也自頭流轉入清溪山每陟最高峯望松京痛
哭人指其峯曰望京峯 太祖嘗幸清溪狷韜
面不入 太祖嘉其節請見以賓主之禮狷始
出見揖而不拜語多不諱而 太祖皆容之臨
還 命封以清溪一曲任便居住又築石室而
與之狷終不居移住楊州之松山因以自號

○圃隱鄭先生夢周麗季為侍中忘身殉國欲

扶社稷我 太祖設宴請之作歌侑酒以觀其
意圃隱作歌送酒曰此身死了死了一百番更
死了白骨為塵土魂魄有也無向主一片丹心
寧有改理也歟親海東

○吉冶隱先生再高麗恭讓王時為門下注書
知國將亾棄官歸善山以講明道學為務國初
定宗以太常博士徵遂上書曰女無二夫臣
無二主放歸田里以遂不事二姓之志 上許
之 世宗初崇獎節義召用其子子師舜赴召
公誠之曰汝當效我向高麗之心事汝朝鮮之

王乃父之心外此無望也

見師友錄

○金白巖濟善山人麗末知平海郡事聞聖

朝開運臨海痛哭題詩曰呼舡東問魯連津五

百年今一介臣可使孤魂能不死願隨紅日照

中垠別妻子着蘆笠子乘舟八海不知所終

○金籠巖澍白巖之弟奉使天朝歸到鴨綠

江始聞時事臨江痛哭寄書夫人柳氏曰忠臣

不事二君烈女不更二夫吾渡江即無所容其

身送朝服及靴但以此為信夫人下世後以此

合葬為我夫婦之墓且以到江上還向中朝

之日為我忌日遂遯荆蠻謚忠貞

見雙節錄

○徐甄遯居衿川鄉由慨念前朝之事作詩曰

千載神都隔渺茫忠良濟濟佐明王統三為一

功安在却恨前朝業不長臺諫欲罪之太宗

變色曰甄為高麗之臣作詩思之是亦夷齊之

流不可罪也

○李養中廣州人麗末任刑曹左參議當革命

之初抗不臣之節遁去廣州村庄不受徵命

太宗以龍潛故人眷遇甚至特拜漢城尹亦不

受太宗常幸廣州召與道舊公野服攜琴拜

謁獻壺酒盤魚歡然而罷竟不奪其志特官其子以獎之嘗分御羞好問不絕

○逐睡錄曰王氏之公但圃冶二人能成大節而不知牧隱之為人可惜 太宗受命之後召穡引見穡長揖不拜 太宗降御榻接以賓禮俄而侍講以次列進 上還陞御榻穡昂然而起曰老夫無坐次遂出

○新羅加林郡女爲素那妻夫赴戰妻畱在其家及那死有人吊之妻哭曰公人常曰大丈夫固當死王事豈可死家人之手乎今死乃其志

也

見東
京誌

○許文敬公珙有女林衍時執國命欲以其子娶之公不聽衍告于主王召謂曰衍奸凶不可取怨卿浚計之對曰臣寧受禍不敢嫁女於賊臣之家見麗
史

○冶隱先生善山人 聖朝龍興以罔僕之義避隱于金烏山下婢僕皆感化有一婢年十八其夫以與販爲業飄風海外未知存沒守信不改十年後其夫自日本還來浚夜至家呼門妻答曰言辭舉止莫非家翁雖喜再生之逢然浚

夜無人安可以輕易相對乎終不開門坐以待
朝會族黨出見乃其夫也因復偕老見國朝
○麗季倭賊大入寇康好文妻文氏遇賊突入
居里文有二兒扶幼攜長將走匿而被虜棄兩
兒至夢佛山石崖高千尺曰汚賊求生不如潔
身就死即奮身而墜下有藤蘿草密得不死居
三日賊退乃還

○麗季倭賊突入至靈山郎將金遇賢以起軍
將命監軍問其妻妻答曰若褒賞之事則當
告夫所在今欲加罪豈忍實告使良人就死地

乎痛加杖訊終不言而死

○高麗忠愍王時民有兄弟偕行弟得黃金二
錠以其一與兄至陽川江同舟而濟弟忽投金
於水兄恠問之弟曰吾平日愛兄甚篤今而分
金忽萌忌兄之心此乃不祥之物也不若投諸
江而念之兄曰汝言誠是亦投之水時同舟者
皆愚民無問其姓名云見輿覽

○金文正公台鉉光州人嘗與濟輩受學於先
進家家有新寡稍解詩一日從窓隙以詩投之
曰馬上誰家白面生邇來三月不知名如今始

識金台鉉細眼長着暗入情自此絕不往賀聖
節如元帝適幸甘肅詔諸國使皆至京師而止
公曰止於京師帝命達於行在吾君命也寧獲
罪於帝不敢廢君命中書省許之遂達於行在
帝嘉忠懇大加賞賚

○金得培

恭愍王時人

為賊臣金鏞所害梟首于尚

州圍隱先生時為藝文檢閱自以得培門生請
于王收葬其屍見圖隱集

右明倫

李文忠公仁復曰吾性偏忌恐有失言以忍為

守迄今老矣不覺心動此吾養之未至耳

○吉洽隱嘗曰人之晝有錯於言行夜不存心
每至夜撥置萬念靜坐不言中夜而寢或擁衾
待曉雞初鳴而起具衣冠晨謁于祠堂退于書
室對案危坐講明道學竟日忘倦言必主忠孝
闢異端

○權文正公溥平居目不睨粉黛口不發財賄
待子姪如賓遇輿僮如尊

○金文正公台鉉言動循禮晝不臥暑不袒

○許文敬公羣居慎口燕處如見大賓

○國隱先生終日危坐手在兩膝穆然不動嘗航海朝天及使日本每當風濤危急意思愈整精神愈清明歛衽高拱如坐室中周旋規○薛文良公公儉位至中贊布衾莞席蕭然若山居嘗臥疾蔡洪哲入臥內問疾出而嘆曰自吾輩而望公所謂壤蟲之於黃鵠也規麗○庾應圭茂長人操行貞固持議端方時鄭仲夫等放毅宗立明宗應圭奉表如金告奏金主疑其篡不報應圭曰使於四方不辱君命臣之職也因具服立庭向闕待命晝夜不移七日不

食金主憐之授回詔賜御饌幣帛而遣之金人高其節使价往來必問安否嘗守南京一芥不取其妻得疾但啜菜羹美有衙吏密饋雙雉妻曰良人平生未嘗受人餽遺豈宜以我口腹累良人清德南人至今誦之

○李文正公公升操行高潔嘗奉使如金時使者例收管下軍銀一斤公不受一錢毅宗乘月遊清寧齋目公曰秋月澄霽無一點塵正如公升芻中見麗

○散員同正盧克清家貧將賣宅未售因事之

外郡其妻受郎中玄德秀白金十二斤賣之克
清還詣德秀曰予嘗買此舍只給九斤居數年
無數椽加飾而贏得三斤豈理也請還之德秀
曰爾能守義予獨未耶遂不受克清曰予平生
不為非義豈可賤買貴賣以贖于貨子若不從
即當悉還其直復吾家也相讓不已聞者皆歎
曰末俗競利之世得見如斯人也全上
○李文忠公公遂還自燕京中途馬困至閭山
站無人積粟于野從者取飼之公問粟一束直
布幾尺如其言書布兩端置積粟中從者曰人

必取去何益公曰吾固知之然必如是而後吾
心得安全上

右敬身

沙梁部人貴山新羅貞平王時人少與笏項相善同受
戒於其師一曰事君以忠二曰事親以孝三曰
交友以信四曰臨戰無退五曰殺生有擇及百
濟來侵貴山笏項并以少監拒之羅兵力困引
退貴山曰吾嘗受教於師臨戰無退豈敢墜教
乎與笏項力戰死之羅王率羣臣迎于阿邦之
野并以禮葬之見三國史

○百結先生居狼山下家極貧衣百結因號之
歲將暮隣里舂粟其妻聞杵聲曰人皆有粟我
獨無何以卒歲先生歎曰夫死生有命富貴在
天其來也不可拒其去也不可追子何傷乎乃
鼓琴作杵聲以慰之世傳謂確樂覲輿

○薛文良公接物以儉持己以恭朝官六品以
上有親喪雖素不相知必素服往吊有造謁者
無貴賤倒屣出迎覲麗

○李文忠公齊賢人有片善惟恐不聞先輩行
事雖細為難全上

○韓惟漢隱於智異山清修苦節世高其風致
高麗王聞名遣使迎之謝曰外臣無所知即閉
門不出使者排戶而入壁上書一句曰一片絲
綸來入洞始知名字落人間從北牖而逃

○恭愍王時柳濯為侍中有一詔使出來舉止
甚峻頗傲於王見宰相不肯與坐及見濯禮貌
甚恭李穡謂同列曰柳侍中動容中禮其見重
宜矣覲列

○圃隱先生曰儒者之道皆日用平常之事飲
食男女人所同也至理存焉堯舜之道亦不外

此動靜語默之得其正者即堯舜之道見麗

○李牧隱先生稽曰夫事親事君其道則同程子以盡已訓忠始知孝者亦忠焉而已為臣而盡已在朝之忠也為子而盡已在家之忠也仕而喜已而愠則必不能盡已於君近而狎遠而怠則必不能盡已於親孝不以遠近異忠不以仕已易非盡已者能之乎

右通論

海東續小學卷之四

